

[Augsburg], 19. Februar 1569

An Theodor Zwinger

UB Basel, Fr. Gr. I 11, fol. 318r.

Übersetzung: Brändly, Carinus S. 90f. (Auszüge).

S. Nuncius de obitu D. Carini, patroni et amici praeclarè de meriti, non tam inopinatus, quam tristis et luctuosus mihi accidit. Nam illi quidem senectutis et morborum molestijs liberato gratulandum potius est. De Catonis dedicatione haud quicquam muto. Nam cum hinc discedens, epitaphium à me stipulatus esset: id in bibliothecis quam in aere aut marmore extare, honorificentius esse duxi. Viciessem et ille saepius vltò mihi promisit, se in testamento suo mei memorem fore. Quod si factum non est, aequi boniqué facio, plurib[us] ab eo beneficijs affectus, quam soluendo vt sim. Sin aliquid ea de re cognoscere potueris: rogo vt mihi signifies. Evidem haeredipeta non sum. Sed si quid ex liberalitate amici, absque cuiusquam iniuria ad me perueniret: non aspernarer oblatum beneficium. Sed facilè credo nihil mihi expectandum esse. Vt enim aliqua mei mentio facta sit: haeredes dissimulabunt. Ea enim fortuna sum, vt extraordinarijs sumptibus penè ad egestatem redigar: extraordinarij emolumenti haud ferè quicquam ad me perueniat. Specimen Isocraticum mihi perplacet, modò strenuè pergent. Διαρρήδην Oporianianis scripsi, Ciceroniana me velle Episcopij esse: qui quidem spem meam frustratur, rejecto specimine Demosthenico. Idem scribit: quamuis inter nos nondum quicquam conuentum sit: quod vtrum de Oporianianis, an de me scribat, nescio. Tu quidem anno superiore mihi significasti, eum acquiescere in conditionibus à me propositis. Eae autem fuerunt, vt pro binis integris paginis impressis (2 gantze getruckte pogen) singuli florini vnà cum 12 editi operis exemplis, mihi darentur. Sed hac de re minus labore, et spero typographos non ingratos fore: modò quamprimum emendatè omnia edantur. In quo quantum tuae fidei, diligentiae, autoritati debeam, gratissimo animo agnosco, neque vnquam obliuiscar. Per Friburgensem nuper scripsi ad praetorem, vt iusseras. quib[us] literis nihil opus esse gaudeo. In ijs etiam Vlpiani graeci feceram mentionem: quo nunc facilè careo, acceptis Epsicopij codicibus 2. Demosthenem ab Oporianianis commodatò petij. Sed se repulsam tulero: te etiam atque etiam oro, vt epistolas Demosthenis et Aeschinis (sicubi fortè Basileae in priuata quapiam bibliotheca extant. In hac tota quidem vrbe nusquam reperiuntur) meo sumptu describendas et quamprimum ad me mittendas cures: vt ne quid in editione Demosthenica desideretur. Vale, vir Clariss[ime] et vicissim, si quid voles, imperato. 19 Februarij 1569.

Hiero[nymus] Wolfius
Tuus.